

AWIG-AWIG DESA ADAT JUMPAL.

MURDHA CITTA

Om Swastiastu, Om Awighnamastu nama sidhām,

Putusing Paruman Krama Deśa, duk rahiņa Buddha Kliwon Pahang Tīleming Kadasa
Tanggal 11 Mei 1994, gumawe Awig-awig Deśa Pakraman maka sepat siku-siku
pameneh, waštu kasiddha prayojanan mami kabeh prasama angidep muah amagehaken
kadi linggih Awig-awig iki.

Om Śantih Śantih Śantih Om

DAGING CAKEPAN AWIG-AWIG

	Murdha Citta	1
	Daging Cakepan Awig-Awig	2
Sarga I	Aran Lan Wewidangan Deśa	1
Sarga II	Patitis Lan Pamikukuh	1
Sarga III	Sukertha Tatha Pakraman	2
	Palet 1 Inḍhik Krama	2
	Palet 2 Prajuru/Dulun Deśa	4
	Palet 3 Inḍhik Kulkul	5
	Palet 4 Inḍhik Paruman	6
	Palet 5 Inḍhik Druwen Deśa	7
	Palet 6 Sukertha Pamitegep	8
	Kaping 1 Karang, Tegal lan Carik	8
	Kaping 2 Pepayonan	9
	Kaping 3 Wewangunan	10
	Kaping 4 Wewalungan	10
	Kaping 5 B h a y a	11
	Kaping 6 Panyanggran Bañjar	12
Sarga IV	SUKERTHA TATA AGĀMA	12
	Palet 1 Inḍhik Dewa Yajña	12
	Palet 2 Inḍhik Resi Yajña	15
	Palet 3 Inḍhik Pitra Yajña	16
	Palet 4 Inḍhik Mānuṣa Yajña	19
	Palet 5 Inḍhik Bhūta Yajña	20
Sarga V	SUKERTHA TATA PAWONGAN	21
	Palet 1 Inḍhik Pawiwahan	21
	Palet 2 Inḍhik Nyapian	23
	Palet 3 Inḍhik Sentana	25
	Palet 4 Inḍhik Warisan	26
Sarga VI	WICARA LAN PAMIDHAṆDHA	28
	Palet 1 Inḍhik Wicara	28
	Palet 2 Inḍhik PamidhaṆdha	29
Sarga VII	NGUWAH-NGUWUHIN AWIG-AWIG	30
Sarga VIII	P A M U P U T	31

SARGA I

ARAN LAN WEWIDANGAN DEŚA

Pawos 1

- 1) Deśa Adat puniki mawāṣṭa Deśa Adat Jumpai.
- 2) Jebar kakuwub wewidanganya mawates nyatur:
 - ha. Sisi Wetan ring : Tukad Unda.
 - na. Sisi Kulon ring : Subak Pagatepan.
 - ca. Sisi Lor ring : Deśa Adat Gelgel.
 - ra. Sisi Kidul : Sagara.
- 3) Deśa puniki kawangun antuk karang ayahan deśa, turmaning kaepah dados 2 (kalih) bañjar inggih punika:
 - ha. Bañjar Kawan.
 - na. Bañjar Kangin.

SARGA II

PATITIS LAN PAMIKUKUH

Pawos 2

Deśa Adat puniki ngamanggehang pamikukuh minakadi:

- ha. Pañcasila.
- na. Undang-Undang Dasar 1945, pamekas Pasal 18.
- ca. Tri Hita Karaṇa mānūt sadacara Agāma Hindu.

Pawos 3

Petit Deśa Adat puniki kasurāt kadi ring sor luire:

- ha. Mikukuhin miwah ngrajegang Sang Hyang Agāma.
- na. Nginggilang tata prawertine magāma.
- ca. Ngrajegang kasukerthan deśa, saha pawongannya sekala lawan niskala.

SUKERTHA TATHA PAKRAMAN

Palet 1

Inḍhik Krama

Pawos 4

- (1) Sane kabawos krama deśa inggih punika kaluarga sane maagāma Hindu saha ngemong karang deśa.
- (2) Sajaba punika sinanggeh tamiu.

Pawos 5

Krama deśa wenten 2 (kalih) soroh, luire:

- ha. Krama ngarep : kulawarga sane ngemong karang deśa, miwah sane tan ngemong karang deśa, tur sane sāmpun mawiwaha.
- na. Krama ungu : kulawarga katinggalin yayah ṛeṇa, balu wadon uthāwi balu lanang, lan kulawarga sane durung antes ngayah.

Pawos 6

Kawit dados krama deśa : inggih punika sangkaning ngemong karang deśa, miwah sane tan ngemong karang deśa, tur sane sāmpun mawiwaha.

Pawos 7

Panemaya tedhun makrama deśa:

- ha. Ngantos 42 (petang daśa kalih) rahiṇa mawiwit pawiwaha.
- na. Prade durung aśāśih pitung rahiṇa wenang nyabran wali saha majalaran antuk materag gae wiadin ulam sadurung sengker (mānūt dṛeṣṭa).

Pawos 8

Sahman krama deśa keni tetegenan (ayah-ayahan) luire:

- ha. Ayah nyumek, mapiteges urunan miwah ayahan mamungkul saking krama ngarep.
- ma. Ayah unggu, mapiteges ayahan miwah urunan saparo saking krama ngarep (sajeroning papatusan/atiwa-tiwa).
- ca. Prade rikalaning ngayah wenten sinalih tunggil krama matilar sadurung puput karya, wenang krama inucap keni pamidhaṅdha mānūt paraṅem.

Pawos 9

Krama deśa kadadosang:

- ha. Mapuangkid uthāwi tan tedhun ngayahang deśa rikala:
 - 1. Mayajña, matepetin, kaluasan padgatakala (dadakan).
 - 2. Kengin mawaneng wantah apisan, sajawaning wenten uwak-uwakan saking Prajuru Deśa.
- ma. Nyada, risāmpun pianaknyane pinih kelih mawiwaha.
- ca. Nyada mapiteges ngamademang ayah, risāmpun mayuṣa 60 (enem daśa) warṣa yan prade mawiwaha malih wenang mawali katedhunang makrama.
- ma. Luput duaning kasudi dados pamangku deśa.

Pawos 10

Wusan dados krama deśa, luire:

- ha. Sangkaning:
 - 1. Pinunas ngraga, duaning kesah ka dhura deśa uthāwi nglangkungin Segara.
 - 2. Kanorayang, duaning sāmpun tan prasiddha ngesehin solah maprawerti satata nguwug kecaping awig-aig sasāmpun polih panglemek saking prajuru saniṣṭannya ping kalih.
- ma. Sang wusan makrama:
 - 1. Tan polih pah-pahan druwen deśa.
 - 2. Karang ayahan deśa sane kagenahin manggeh druwen deśa.

Palet 2
Prajuru/Dulun Deśa

Pawos 11

- (1) Desa Adat kaenter antuk Bendeśa Adat.
- (2) Bañjar kaenter antuk Klian Bañjar.
- (3) Bendeśa lan Klian Bañjar patūt:
 - ha. Mawiwit saking krama ngaṛep.
 - na. Kaadegang malarapan antuk sasudian krama deśa adat sajeroning paruman deśa nyabran 8 (kutus) warša, sajawaning wenten pariṇdhik tios tur dados kasudi malih.
 - ca. Maduluran dewa sakṣi ring Pura Bale Agung (Pura Deśa).

Pawos 12

- (1) Bendeśa Adat kasanggra antuk:
 - ha. Patajuh uthāwi pangliman pinaka wakilnya.
 - na. Panyarikan pinaka juru surāt.
 - ca. Patengen pinaka juru rakṣa.
 - ra. Kasinoman pinaka juru arah (saya).
- (2) Kasinoman akehnia mānūt kawigunaṇ saha magilir nyabran ngaśaśih.
- (3) Sajeroning ngenterang sukertan niskala Bendeśa mingsingghang pamangku Kahyangan Deśa.

Pawos 13

Swadharmaning Bendeśa Adat luire:

- ha. Ngenterang pamargin sadaging awig-awig miwah paraṛem deśa.
- na. Nuntun tur ngenterang krama rawuhing warga deśa mānūt petitis.
- ca. Mawosin kalih niwakang pamutus aṛep ring wicara.
- ra. Maka dhuta matemuang bawos ring sapa sira ugi.

Pawos 14

Petias uthāwi olih-olihan krama deśa luire:

ha. Papeson satenga rikala wali ring Kahyangan Deśa.

na. Petias siosan mănūt paraḡem.

Pawos 15

(1) Prajuru Deśa kagentosin riantukan:

ha. Śeda.

na. Kanorayang duaning iwang pamargi menawi nilar śāsana.

ca. Wit saking pakayun uthāwi pinunas ngraga.

ra. Sāmpun tutug sengker 8 (kutus) warṣa.

(2) Nganorayang uthāwi ngentosin prajuru patūt paruman tur kaingkupin antuk krama deśa.

Palet 3

Iḡdhik Kukul

Pawos 16

(1) Kukul ring deśa luire:

ha. Kukul deśa.

ca. Kukul bañjar.

ca. Kukul ring pura-pura.

ra. Kukul sekaa-sekaa.

(2) Tatepakan kukul deśa:

ha. Atuludan lambat, tengeran tedhun ngayah.

na. Atuludan bulus, tengeran kapañca bhaya.

(3) Tengeran kukul ring soang-soang babañjaran:

ha. Tung, tung, tung, tatengeran ngrorod.

na. Tung, tung, tung,, tung, tatengeran nyapian.

ca. Kukul kalayu sekaran pateh sakadi kukul tedhun ngayah sakewanten nyalah baang.

Pawos 17

- (1) Kukul deśa uthāwi bañjar tan wenang katepak yening tan sangkaning pitudhuh prajuru sajawaning tengeran kapañcabhayan.
- (2) Sang nepak tan sangkaning pitudhuh patūt digelis atur supekša maka buatan panepake, yan tan sapunika wenang sang mamurug kapidhaṅdha mǎnūt paraṅem.
- (3) Kukul sekaa-sekaa samaliha kukul kakubon tan kalugra matehin sukat uthāwi tengeran kukul deśa prade mamurug kadhaṅdha mǎnūt paraṅem.
- (4) Yening Prajuru Deśa iwang nepak kukul majalaran nenten taken nenten keni pamidhaṅdha.

Palet 4

Iṅdhik Paruman

Pawos 18

- (1) Sangkep/parum ring deśa wenten:
 - ha. Sangkep bañjar/deśa adat nyabran ngaśaśih mǎnūt panemaya uthāwi uger-uger tan ngwentenang pangarah-arrah.
 - na. Paruman bañjar/deśa kawntenang napkala tur kawiwitin antuk pangarah mǎnūt kabuatannya.
 - ca. Paruman Prajuru Deśa kawntenang mǎnūt wiguna.
 - ra. Sangkepan/paruman sekaa-sekaa mǎnūt bebuat.
- (2) Paruman deśa uthāwi bañjar madudonan sakadi ring sor:
 - ha. Prasiddha kamargiang risāmpun katedhunin antuk krama sakirangnya satenga langkung ring sang patūt ngamiḷetin, kamanggala antuk tatengeran kukul miwah mabhuṣaṇa adat madia, saha tan kalugra makta gegawan sakaluire: tan maren ngroana ring Ida Bhagawan Panyarikan masarana cane.
 - na. Pangawit kalakṣaṇayang panyakcak.
 - ca. Tan kalugra ngwetuang suara ghora uthāwi byota, yan wenten sapunika keni pamidhaṅdha pacamil kadi dhaṅdhaning nguman-uman ring paruman.
 - ra. Pamutus bebawos marūpa briuk sapanggul (ingkup) punika kamanggehang.
- (3) Prade pidaging paruman tan kaingkupin mangda Prajuru Deśa ngilikang bebawos saha pamutusnya mangda

karagemin antuk krama deśa, bilih tan prasiddha kasungkemin jantos ping tiga prajuru wenang nunas bawos ring Guru Wiśeṣa.

Pawos 19

- (1) Sajeroning paruman deśa, Bendeśa patūt nyiarang pamargin ngenterang deśa, pamekas nganinin iṅdhik:
 - ha. Muñjuk lungsuring pakraman saha ayah-ayah, sulur artha braṇa druwen deśa.
 - na. Prajuru Deśa ngriṅcikang nganinin usaha deśa kapungkur.
- (2) Pamutus paruman deśa sinanggeh paraṅem maka pamitegep awig-awig.

Pawos 20

- (1) Sangkepan prajuru kawenangang wantah ngriṅcikang usaha deśa kapungkur.
- (2) Sangkepan Prajuru Deśa tan kawenang ngamedalang tategenan ring krama sadurung kaingkupin antuk krama deśa.
- (3) Pamutus sangkepan Prajuru Deśa ngwetuang pasuara, maka pidaging pitudhuh sang ngawiwenang.

Palet 3

Iṅdhik Druwen Deśa

Pawos 21

Padruwen Deśa Adat sakadi ring sor:

- ha. Kahyangan Deśa luire: Pura Puseh, Pura Segara, Pura Taman Sari, Pura Nataran Daḷem Cangkring miwah Pura Daḷem Setra.
- na. Bale Deśa Bañjar Kangin miwah Bale Bañjar Kawan.
- ca. Tanah tegalan.
- ra. Tanah ayahan deśa, muñjuk lungsur saking karang ring ajeng.
- ka. Setra-setra makadi setra sisi, setra tengah lan setra kauh.
- da. Palabha pura, carik lan tegal.
- ta. Lelanguan, minakadi tetabuhan lan ilen-ilen padruwen bebañjaran luire:
 1. Gong soang-soang bañjar.
 2. Ilen-ilen wali pura: rejang, telek, barong lan topeng.

3. Calonarang.

sa. Lembaga Perkreditan Desa.

Pawos 22

Olih-olihan Deśa Adat luire:

- ha. Saking palabha pura.
- na. Urunan saking krama Deśa Adat.
- ca. Paica saking Guru Wiśeṣa.
- ra. Paica-paica uthāwi aturan tiosan sane patūt.

Pawos 23

- (1) Prajuru Deśa wenang ngetangang pamupon palabha pura lan sapanunggilan druwen deśa.
- (2) Pikolih lan pamuponnya kaanggen prabea pangaci upacāra saha wewangunan ring pura.
- (3) Nyabran pasangkepan deśa, prajuru pangemong druwen deśa nyarwakang pariṇdhikan padruwene ring krama deśa.
- (4) Sakaluiring druwen deśa patūt wenten ilikitannya.
- (5) Tan kalugra ngadol uthāwi ngesahang padruwen deśa yan tan kasungkemin antuk krama deśa.

Palet 6

Sukertha Pamitegep

Kaping 1

Karang, Tegal lan Carik

Pawos 24

- (1) Krama deśa pangemong karang deśa patūt ngwatesin karang inucap antuk pagehan uthāwi tembok mangda pakantenannya asri.
- (2) Wates sisi kaler miwah kangin patūt kakaryanin antuk sang ngemong karang inucap, sane mawāṣṭa gegaleng ke luan, sane kelod miwah kauh kapiara antuk sang ngemong karang, reh punika mawāṣṭa gegalengan ka teben.

- (3) Prade karasayang pagehan uthāwi tembok inucap nglikadin, yan padha arṣa panyandinge, kengin watese nganggen pinget kewanten kasakṣiang antuk prajuru uthāwi pracihna pal saking Badan Pertanahan Nasional.
- (4) Prade wenten karang kabebeng mangda kautsahayang wenten margi.

Pawos 25

- (1) Sinalih tunggil krama deśa uthāwi bañjar tan kalugra:
 - ha. Nglahlah margi, tegal, lan carik.
 - na. Nglahlah tanah, tegak kahyangan, setra, lan sakañcan tegak sane kasinanggeh śuci.
- (2) Prade wenten krama sane malakṣaṇa sakadi ring ajeng wenang ngwaliang tanah inucap tur kadulurin antuk upakāra ring panglahlahan tanah śuci saha katiwakin pamidhaṇdha mānūt paraṇem.

Kaping 2

Pepayonan

Pawos 26

- (1) Ngawit nandur kakayonan tanem tuwuh patūt adhepa agung saking wates karang, prade jantos nglimbak wates wenang kasepat gantungin.
- (2) Yaning wenten tetanduran tanem tuwuh sane ngungkulin, samaliha mawaṣṭu mayanin kapisaga patut kawara antuk paiguman ring ajeng prasiddha sang nruwenang wit ngrebah uthāwi notor (munggul).
- (3) Prade sām̄pun kawara taḷer tan wenten usaha sang nruwenang wit, sang rumasa kaḷetehan uthāwi kajerihang wenang masadok ring Prajuru Deśa, tur risām̄pun kaparitas kalugra ngicalang wit inucap, sakewanten patin kakayonan patūt kawaliang ring sang nruwenang.
- (4) Sang keni pamidhaṇdha panyangaskara saha prabea mānūt paraṇem aṇep ring wewangunan sang karubuhin, luire:
 - ha. Sang nruwenang wit sinanggeh mayanin, prade pungkāt ngrubuhin wewangunan krama tiosan.
 - na. Sang notor, munggul uthāwi ngrebah taru tur ngrubuhin krama tiosan.
- (5) Krama deśa patūt ngamanggehang kawerdian tanem tuwuh sane ngawinang deśane asri tur lestari.

Kaping 3

Wewangunan

Pawos 27

(1) Nyabran ngwangun patūt:

ha. Masadok ring Prajuru Deśa, ping ajeng prade wewangunan nganinin wates.

na. Nganggen aṣṭa bhūmi miwah gegulak aṣṭa kosala-kosali, saniṣṭannya mālūt ring petitis niskala.

ca. Tan nyayubin kapisaga.

(2) Prade wewangunan jantos nyayubin bilih-bilih temboke ring telenging wates, risāmpun kawara tur kasadokang ring Prajuru Deśa wenang kadhaṇḍha mālūt paraṇem saha tembok inucap kagubar uthāwi saniṣṭane mangda kakaryanang abangan.

Kaping 4

Wewalungan

Pawos 28

(1) Sahanan warga deśa sane miara wewalungan patūt sayaga nitenin wewalungannya upami negul minakadi nglogor mangda tan ngrusakin karang uthāwi pabianan krama siosan, bilih-bilih jantos ngletihin kahyangan.

(2) Prade wenten wewalungan malumbar uthāwi ngeleb ngrusakin karangan/pabianan krama siosan, risāmpun kawara kengin kataban tur kadhaṇḍha ngwaliang wit sane karusak saha nawur panebas papiaran tetabanan, mālūt panglokikan Prajuru Deśa.

(3) Prade jantos ngletihin genah śuci, risāmpune kaparitas antuk prajuru, wenang sang nruwenang kadhaṇḍha mālūt paraṇem, tur keni prabea mrayaścitta durmenggala.

(4) Krama deśa patūt nyanggra wewalungan miwah sarwa praṇi, tan kapatūt ngamademang pakṣi miwah nuba ulam.

Kaping 5

B h a y a

Pawos 29

- (1) Pariṇdhik Pañca Bhaya, luire : jiwa bhaya, artha bhaya, gumi bhaya, bayu bhaya, toya bhaya.
- (2) Sang manggihin kahanan pañca bhaya, patūt nepak kulkul bulus mapitulung anut pawos 16 (2) aksāra na.
- (3) Prade ring deśa kahanan jiwa bhaya, patūt deśane ngaturang bhūta yajña tur sang mayanin katur ring sang ngawiwenang.
- (4) Prade wenten jadma mamisuh uthāwi nguman-uman jadma tiosan ring paraṛeman patūt keni pamidhaṇḍha prayaścitta.

Pawos 30

- (1) Sang manggihin kahanan bhaya, patūt ngulkul mapitulung anūt ring pawos 16 (2) aksāra na, uthāwi sang kamalingan atur supekṣa ring Prajuru Deśa, prade mayanin, ngrusak uthāwi ngamaling druwen deśa sane kasinanggeh śuci patūt pamidhaṇḍha punika kawehin antuk pangaskara caru lan prayaścitta tur sang kasinanggeh dhuṣṭa katur ring Guru Wiśeṣa.
- (2) Pratingkahe mapailon ring dhuṣṭa kabawos sruron, prade wenten jadma manggihin maling tan pasadok ring Prajuru Deśa jantos jadma tios nyaduang, patut kadhaṇḍha kadi nandhanin maling, sakuweh pangargan wit mānūt cacakan bañjar, tur prade jantos ping tiga malakṣaṇa asapunika wenang kasukṣerah ring Guru Wiśeṣa.
- (3) Prade wenten jadma ngṛeṛeh reramon, minakadi daun kelapa, ron tan pasadok ring sang nruwenang prade kacunduk patūt kadhaṇḍha kadi nandhaning maling.
- (4) Yaning wenten jadma ngrañjingin pakubon wiadin pakarangan rikala suwung, mawaṣṭu sang madruwe karang kaicalan, wenang jadma inucap katuwekang antuk madewa sakṣi ring Pura Bale Agung tur jadma inucap kaaturang ring Guru Wiśeṣa.
- (5) Mangda tan katuwekang mānūt ring ajeng, asing-asing ngrañjingin kubon jadma tiosan patūt:
ha. Matengeran suara (makaukan).
na. Nyantos sang nruwenang karang rawuh uthāwi masadok ring pangapit pinih tampek, maka

buatan pangrauhe.

ca. Pamedal karangnya kadagingin sawen, makacihna pangarah rikala suwung.

Kaping 6

Panyanggran Bañjar

Pawos 31

Krama deśa rikala ngwentenang karya suka duka, patūt kasanggra antuk bañjar, luire:
Prade ngwangun Pitra Yajña uthāwi Mānuṣa Yajña, patūt pinunas sang mayajña.

SARGA IV

SUKERTHA TATA AGĀMA

Palet 1

Iṅdhik Dewa Yajña

Pawos 32

(1) Palinggih panyiwian sawidangan Deśa Adat Jumpai luire:

ha. Kahyangan Tiga :Pura Deśa uthāwi Pura Segara, Pura Puseh, miwah Pura Dhaḷem.

na. Pura Panataran Dhaḷem Cangkring, Pura Taman Sari.

ca. Pura Melanting.

ra. Pura Dhaḷem ring soang-soang bebañjaran.

(2) Rahaṅ piodalan ring soang-soang kahyangan inucap, kadi ring sor:

ha. Pura Deśa (Pura Segara) rikala Anggara Umanis Kuningan.

na. Pura Puseh, rikala Soma Kliwon Kuningan.

ca. Pura Panataran Dhaḷem Cangkring rikala Buddha Wage Langkir.

ra. Pura Dhaḷem Kutulampa rikala Anggara Kliwon Medangsia.

ka. Pura Dhaḷem Kaleran rikala Purnama sajeroning 7 (pitung) rahaṅ wusan Anggara Medangsia.

da. Pura Taman Sari rikala Buddha Wage Ukir.

(3) Pangaci ring pura inucap mănūt kecap sāstra agāma, saha kalakṣaṇayang niṣṭa, maḍya, utama mănūt kawentenan lan paraḥem.

(4) Pangempon soang-soang pura mănūt dreṣṭa kadi ring sor:

ha. Pura Puseh lan Pura Segara, kaempon antuk Bañjar Kawan.

na. Pura Panataran Dhaḥem Cangkring lan Pura Taman Sari kaempon antuk Bañjar Kangin.

ca. Pura Dhaḥem Kekeran kaempon antuk Sekaa Dhaḥem Kekeran.

ra. Pura Dhaḥem Katulampa kaempon antuk Sekaa Dhaḥem Katulampa.

Pawos 33

(1) Ring soang-soang pura inucap kawentenang pamangku.

(2) Ngadegang pamangku nganūt dudonnya:

ha. Turunan uthāwi ngwaris.

na. Nyañjan uthāwi masemburang, soang-soang mapiteges mapinunas ring ajeng panataran wiadin ka pura uthāwi ring balian sonteng lan sapanunggilannya.

ca. Sasudian.

(3) Tan kawenang kaadegang dados pamangku luire:

ha. Peceng, perot, cungh lan sapanunggilan.

na. Sungkan ila, ayan, buduh wiadin edan.

ca. Sane madḥebe parilakṣaṇa urip sane tan becik.

ra. Jadma sane nenten janten bapannya (panak bebiñjat).

(4) Prabea kapamangkuan:

ha. Pawintenannya kamedalang saha kalakṣaṇayang antuk sang ngadegang, makadi krama deśa uthāwi pangempon pura soang-soang.

na. Pitra Yajña pamangku Kahyangan Deśa riwekas patūt kasanggra antuk krama deśa.

Pawos 34

Swadharma pamangku luire:

ha. Ngenterang yajña upacāra piodalan ring kahyangan uthāwi ring soang-soang pakubon krama.

- na. Prade sinalih tunggil pamangku kapiulangan uthāwi cuntaka kengin upakāra inucap kamargiang antuk pamangku deśa tiosan, uthāwi nuwur sang sulinggih.
- ca. Samaliha yan sāmpun pamangku ngayah tigang rahiṇa ring pura kañcit wenten kulawarganya kalayu sekaran, mangku inucap tan keneng cuntaka, sakewanten mangku tan kangkat budal salami piodalan.

Pawos 35

Petias uthāwi olih-olihan pamangku luire:

- ha. Sarin canang.
- na. Upon palabha carik/tegal mānūt paraṅem.
- ca. Luput pakaryan lan ṛerampen/ṛeramon rauh pidagingan.

Pawos 36

(1) Pamangku kagentosin riantukan:

- ha. Śeda makakalih (lanang istri).
- na. Pinunas ngraga, sangkaning tan prasiddha ngamargiang swadharmaning pamangku.
- ca. Kanorayang duaning malakṣaṇa amungpang paraning laku.
- ra. Prade pamangku kanorayang sangkaning amungpang paraning laku pamangku inucap, patūt keni pamidhaṇḍha mānūt paraṅem.

(2) Yening pamangku lanang śeda, mangku istri patūt nglakṣaṇayang śāsaning pamangku mānūt kawentenannya.

Pawos 37

Kasukerthan kahyangan kadi ring sor:

(1) Tan kalugra ngrañjing ka pura luire:

- ha. Sahananing cuntaka uthāwi sebel luire:
 1. Sebel kandel ngraja swala, salami durung mrayaścitta raga.
 2. Sebel ngembas rare, salami 42 (petang daśa kalih) rahiṇa.
 3. Sebel pawiwahan, salami durung mabyakala.
 4. Cuntaka sangkaning kapadheman mānūt sengker.

- na. Makta barang sinanggeh ngletehin.
 - ca. Sato ageng sajawaning mapapadha.
 - ra. Nganggen bhuṣaṇa tan mānūt tata caraning ngrañjing ka pura, sang ngrañjing kapura patūt atur supekṣa ring Prajuru Deśa, sadurung polih uwak-uwakan tan kalugra ngrañjing.
- (2) Pratingkahe tan wenang ring pura luire:
- ha. Masumpah/macoran sajawaning pitudhuh Prajuru Deśa.
 - na. Makobatan, mademenan, sirep majangkepan lanang lan wadon, mabacin, mawarih, nyungsang bhuṣaṇa, menahin pusungan.
 - ca. Mungghah tedhun ring palinggih sajawaning pitudhuh Prajuru Deśa.
- (3) Mamurug kecap ring ajeng, keni pamidhaṇḍha pamrayaścitta sepatūtnya.

Pawos 38

- (1) Yan wenten jadma karawuhan ring pura, prade kasumbangsayan kengin kapintonin, yan tan wiakti jadma inucap kasisipan mānūt paraṇem.
- (2) Prade kahyangan kahanan durmanggala, minakadi kapañcabhaya, pamangku patūt digelis nyadokang ring Prajuru Deśa mangda marumang krama deśa tur ngwentenang pamrayaścitta sapatūtnya.
- (3) Yening wenten krama deśa karawuhan ring sajeroning paumahan ipun, patūt atur supekṣa ring Prajuru Deśa.

Palet 2

Iṇdhik Ṛesi Yajña

Pawos 39

- (1) Sang pacang madeg paṇḍhita uthāwi pinaṇḍhita sane jagi ngenterang yajña patūt masadok ring Prajuru Deśa.
- (2) Prajuru patūt nitenin uthāwi nurekṣain mungguhing kawentenannya lakṣaṇa sang pacang mapodgala, mangda yukti tan lempas ring kecaping agāma yan prade lempas, prajuru wenang tan ngraṇemin.
- (3) Krama deśa patūt ngaturang ayah sapamadeg rauh rikalaning lepas sang sulinggih riwekas, katuntun antuk Prajuru Deśa.

Sang sulanggih patūt ngriyinin muput ring wawidangan Deśa Adat Jumpai wus punika wawu muput yajña ka deśa siosan.

Palet 3

Iṅdhik Pitra Yajña

Pawos 41

Pamargin Pitra Yajña mănūt sakadi ring sor:

ha. Pangupakāra sang kalayu sekaran:

1. Mendhem uthāwi ngeseng, makacihna pakingsan ring Ibu Pertiwi uthāwi ring Bhaṭara Brahma, salami nuptupang prabea.
2. Atiwa-tiwa inggih punika upakāra pangabenan/palebon.

na. Upakāra upacāra Pitra Yajña riwusan kaaben mawāṣṭa munggah daun bingih (ngroras) ngraris nglinggihang Dewa Hyang Bhaṭara-Bhaṭari.

Pawos 42

Swadharmaning lan tetegenan krama prade wenten sinalih tunggil krama kalayu sekaran:

ha. Sang kaduhkitan patūt:

1. Masadok ring Klihan Bañjar tur nunas tetimbangan ring kawentenannya.
2. Ngaturin krama ngrombo makarya eteh-eteḥ śawa kadulurin panyembrama sakasidan tur pangrombo nganter ka setra.

na. Swadharmaning bañjar/deśa:

1. Klihan Bañjar maritatas pamargin sang kaduhkitan, napike pacang kapendhem, makingsan riyin uthāwi lantur kaabenang.
2. Prade kapendhem, raris kawentenang kulkul patahu mănūt pawos 16 (3) aksāra na, antuk Klihan Bañjar uthāwi sane kasudi.
3. Panyanggran bañjar salanturnya:
 - 3.1. Ngrombo makarya eteh-eteḥ śawa saha kasaṙengin antuk krama sane mamidara.

3.2. Krama bañjar ngenter mersihin śawa, nganter ka setra jantos pamendhemane puput.

- ca. Tan kengin nglelet śawa langkungan ring 7 (pitung) rahiņa, tur patūt polih pagebagan mānūt paetangan Klian Bañjar (patus).
- ca. Tan kalugra nginepang bangbang ring setra.
- ka. Yening wenten krama kalayu sekaran rikala piodalan ring Kahyangan Deśa, kengin mendhem tan pasadok tur upakārannya kamargiang sasāmpun Ida Bhaṭara kasineb.

Pawos 43

(1) Sane kasinanggeh cuntaka sakadi ring sor:

- ha. Cuntaka antuk kalayu sekaran, ngadut mala, durung kepus pungsed.
- na. Cuntaka antuk ngraja swala.
- ca. Cuntaka antuk ngembasang putra.
- ra. Cuntaka antuk karuron.
- ka. Cuntaka antuk pawiwahan.
- da. Cuntaka antuk gamia gamana.
- ta. Cuntaka antuk salah timpal.
- sa. Cuntaka antuk mobot nenten wenten upacāra pabeyakawonan miwah pawidhiwidhaņaan.
- wa. Cuntaka antuk sad tatayi.

(2) Sengker cuntaka mānūt kawentenannya:

- ha. Cuntaka kalayu sekaran, cuntakannya mānūt sakadi loka dṛeṣṭa miwah sāstra dṛeṣṭa bañjar adat soang-soang.
- na. Cuntaka ngraja swala, 3 (tigang) rahiņa ngawit ngraja swala uthāwi salamining ngraja swala.
- ca. Cuntaka ngembasang putra, cuntakannya 105 (satus lima) rahiņa ngawit ngembasang putra, uthāwi ngantos kaupakārain makambuhan tur maprayaś-citta mānūt tattwa agāma.
- ra. Cuntaka kruron, cuntakannya 42 (petang daśa kalih) rahiņa tur sāmpun maprayaścitta.

- ka. Cuntaka pawiwahan, cuntakannya ngantos upacāra lan upakāra pabeyakaonan.
- da. Cuntaka gamia gamana, cuntakannya ngantos kapalasang/masapihan tur sāmpun kawentenang pamrayaścitta Deśa Adat/kahyangan.
- ta. Cuntaka salah timpal, kapuputang sakadi mānūt agāma Hindu tur dṛeṣṭa/adat soang-soang.
- sa. Cuntaka mamitra ngalang, cuntakannya ngantos kawentenang upakāra pabeyakaonan.
- wa. Ngembas putra tan pabeyakaonan (tan wenten bapannya) cuntakannya ngantos wenten meras sang putra, tur kawentenang upakāra mānūt agāma Hindu.
- la. Cuntaka sad tatayi, cuntakannya ngantos sāmpun maprayaścitta raga tur nenten pisan dados ngamungganghang upakāra padwijatian.

(3) Cuntaka kalayu sekaran/kapadheman kaaben:

ha. Kapadheman cuntakannya:

1. Cuntaka/sebel ke bañjar rauhing 3 (tigang) rahiņa riwusan mendhem uthāwi sasāmpun polih prayaścitta (masapuh).
2. Kulawargannya sajeroning pakarangan miwah kapuruṣa ngantos 11 (solas) rahiņa mānūt dṛeṣṭa.

na. Kaaben cuntakannya:

Sang nyambut karya Pitra Yajña cuntakannya ngawit saking ngrañcang karya rauh riwus yajñanya (mapegat/ngatelunin).

(4) Sane katiban cuntaka luire:

ha. Kalayu sekaran sane kacuntakan:

1. Kulawarga puruṣa.
2. Babañjaran.

na. Ngraja swala sane kacuntakan : sang sane ngraja swala.

ca. Ngembas putra sane kacuntakan : sang ngembasang putra.

ra. Pawiwahan sane kacuntakan : sang ngamargiang pawiwahan (sang nganten).

ka. Karuron sane kacuntakan : kula warga luh muani sane luhnya karuron.

da. Gamia gamana sane kacuntakan : sang sane nglakṣaṇayang gamia gamana lan Deśa Adatnyane.

ta. Anak istri mobot tan pabeyakaonan uthāwi tan pawidhiwidhaṇaan, sane cuntaka anak istri sane mobot.

sa. Mamitra ngalang sane cuntaka, sang malakṣaṇa mamitra ngalang.

wa. Ngembas putra tan pabeyakaonan uthāwi tan pawidhiwidhaṇaan, sane cuntaka
sane ngembasang putra.

- (5) Tan keneng cuntaka luire:sang sulinggih lan mangku Kahyangan Tiga rikala
piodalan risāmpun ngalang śasih/ngalang tengah.

Pawos 44

- (1) Atiwa-tiwa (pangabenan) kalakṣaṇayang antuk:

ha. Nyawa Reṣi (nyuasta geṇi), sāntukan tan ngagah uthāwi tanpa śawa.

na. Śawa prateka (ngagah uthāwi upakāra śawa).

- (2) Panamaya pangabenan wenten 2 (kalih) pawos:

ha. Ngaben dadakan/bah bangun.

na. Ngaben masa.

Pawos 45

- (1) Papatusan pangabenan mānūt dṛeṣṭa, ngaben dadakan uthāwi masa.

- (2) Pangingune ring krama saka sidan.

Palet 4

Iṇdhik Mānuṣa Yajña

Pawos 46

- (1) Mānuṣa yajña inggih punika upacāra-upacāra dharmaning mānuṣa, ngawit saking
patemoning kama bang sajeroning garba ngantos, kalayu sekaran riwekas.

- (2) Upacāra ring ajeng madudonan kadi ring sor:

ha. Magedong-gedongan duk pangrempinian ibiang.

na. Duk sang kamareka embas.

ca. Kepus udel (pungsed).

ra. Roras rahiṇa.

- ka. Tutug kambuhan (petang daśa kalih rahaña).
 - da. Nigang śasih (satus lima rahaña).
 - ta. Pawetuan/otonan/odalan (enem śasih/satak daśa rahaña).
 - sa. Tutug kelih/matebasin (ngraja swala, ngembakin).
 - wa. Matatah/mapandes.
 - la. Mawinten/madwijati.
- (3) Upacāra-upacara inucap ništa, madia, utama mānūt sāstra agāma saha catur dṛeṣṭa, maka buatan deśa dṛeṣṭa, ngawinang sima cara deśa.

Palet 5

Iṇdhik Bhūta Yajña

Pawos 47

- (1) Bhūta yajña inggih punika upacāra byakala ring peṛtiwi lan kahyangan, sarwa praṇi makadi upacāra ring sarwa bhūta.
- (2) Upacāra pabeyakalan ring sarwa praṇi, luire:
 - ha. Ring sarwa tumuwuh rikala Tumpek Pangatag (saniścara Kliwon Wariga).
 - na. Ring sarwa ingon-ingon rikala Tumpek Andang (Saniścara Kliwon Uye).
 - ca. Upacāra pakala-kala mānuṣa anūt widhaṇa, kabawos pabyakala rikala Panampahan Galungan (Anggara Wage Dungulan).
- (3) Upacāra pabyakala ring peṛtiwi, kahyangan lan bebutan kawāṣṭanin macaru.
- (4) Pecaruan inucap ring ajeng ništa, madia, utama, mānūt wiguṇa kadi ring sor:
 - ha. Majot-jotan uthāwi yajña śeṣa nyabraan wusan maratengan.
 - na. Prayaścitta rikala pacang wali ring pura.

Pawos 48

- (1) Nangken ngwarṣa rikalaning Tiḷem Kasanga kawentenang Tawur Kasanga, ketah kabawose Pangrupuk, makacihna pacang nyanggra rahaña Panyepian beñjangnyane, tan kengin nyuarayang kulkul ring tengah wengi.

(2) Catur brata Panyepian sane kamargiang antuk krama deśa:

ha. Amati geni : tan kengin meapi-api.

na. Amati karya : tan kengin nyambut karya.

ca. Amati lelanguan : tan kengin maoneng-oneng, masuara ghora, lan .

ra. Amati lelungan (malali).

(3) Pabrataan inucap kamargiang saking semeng macihna antuk kulkul ngantos semeng beñjangne raris kasuarayang kulkul makacihna pangembake.

(4) Sang mamurug kecap ring ajeng keni pamidhaṅdha mānūt paraṅem soang-soang kamargiang antuk patelik (pacalang/tanda deśa).

(5) Riwus rahiṅa Nyepi (beñjangne) maka cihna pangawit Isaka warṣa patūt soang-soang warga deśa ngwentenang pangakṣama ring kulawargannya soang-soang.

SARGA V

SUKERTHA TATA PAWONGAN

Palet 1

Indhik Pawiwahan

Pawos 49

(1) Pawiwahan inggih punika panunggalan puruṣa lan pradaṅa (lanang istri) malarapan panunggalan suka citta kadulurin antuk upasakṣi sekala lan niskala.

(2) Pamargin pawiwahan wenten palihan ipun luire:

ha. Papadikan, kamanggala antuk pakruṅan.

na. Ngrangkat/ngrorod mamargi riyin sasiliban wus punika wawu kakruṅayang.

ca. Nyeburin uthāwi sentana nyeburin.

(3) Pidabdab sang pacang mawiwaha patūt:

ha. Sāmpun manggeh daha teruṅa mānūt Undang-undang Perkawinan.

na. Sangkaning padha ṛeṅa (tan kapakṣa).

- ca. Mānūt kecaping agāma (tan gamia gamana).
 - ra. Kaparisudayang prade pangambile tios agāma malarapan kasudiwadhāni.
- (4) Pamargin pawiwahan mangda taḷer ngānūtin undang-undang saking Guru Wiśeṣa (pemerintah).

Pawos 50

Pawiwahan sane kapatūtang ring deśa, sakadi ring:

- ha. Sāmpun kamargiang pabeyakala uthāwi pasakapan kasakṣiang sekala-niskala antuk paṇdhita, pinaṇdhita (jero mangku).
- na. Wenten pasakṣi Prajuru Deśa sane mapakelingan uthāwi ngilikitayang pawiwahan inucap.
- ca. Sāmpun matengeran suaran kulkul.
- ra. Pawiwahan inucap ring ajeng patūt kasurāt ring Kantor Catatan Sipil.

Pawos 51

Tata caraning parabian patūt sakadi ring sor:

- ha. Sapasira ugi pacang ngwarangang pakulawangan patūt masadok ring Prajuru Deśa salanturnya Prajuru Deśa maritatasang mānūt kakecap parabian.
- na. Pamargin pepadikan mānūt dudonan :
 1. Pakruṇayan jantos ping kalih risāmpun polih uwak-uwakan prajuru saha malarapan:
 - ha). Kaping pisan malarapan antuk canang sari.
 - na). Kaping kalih (ring pangambilane), malarapan canang dakṣiṇa kakalih.
 - ca). Kaping tiga (ring paswakaan/nunas ring mrajan) malarapan tipal bantal, kabawos pamuput pamadikan.
 2. Risāmpun puput pakruṇayan ping kalih sang istri kairing budal ka pakubon sang lanang saha kalanturang antuk pabeyakala.
 3. Mangda puput tumus sekala niskala, kaping tiga pakruṇayannyane patūt kadulurin pajati ring mrajan wadone.
- ca. Prade ngrorod/ngrangkat patūt ṛeraman lanange ngwentenang pangluku antuk dhuta saniṣṭannya ti

gang diri.

ra. Sajeroning panglukuan patūt:

1. Kamanggala antuk geng sinampura arep ring peraman wadone.
2. Kaigumang bawos indhik pakidih uthāwi paḷegan arep ring pasewakan sang ngidih anak lanang sane kabawos pawiwahan nyeburin.

ka. Pakerabkambeyan mapiteges upacāra tinas apadang mapikuren, duaning mānūt sakadi ring sor:

1. Sajeroning kabawos ambe, kalakṣaṇayang ring sekala niskala antuk sarana jejauman miwah pawidhi widhaṇaan:
 - ha). Jejauman pinaka ngambe/ngadungang kayun soang-soang pakulawargan wadone.
 - na). Widhi widhaṇa pinaka pajati niskala nunas wadone ring pamrajan kemulannya.
2. Sajeroning bawos kerab palakṣaṇa ring sekala:
 - ha). Antuk panyakṣi krama bañjar, duaning parabian antuk tengeran kulkul.
 - na). Pamekas panyakṣi Prajuru Deśa saha ngilikitayang.

Paḷet 2

Iṇdhik Nyapian

Pawos 52

- (1) Pawiwahan prasiddha kawusang malarapan antuk palas marabian uthāwi kapadheman.
- (2) Wusan mapikuren riantukan salah sinunggal śeda mapiteges balu, makadi balu lanang/istri.
- (3) Palas marabian wenten kalih pawos luire sangkaning padha lila miwah mawiwit wicara.
- (4) Sang ayat palas marabian patūt atur supekṣa pailikitaan riyin ring sang rumawos (Pengadilan Negeri) wawu Klian deśa Adat nyiarang kawentenang antuk suaran kulkul, tur keni pasuaran kulkul mānūt paraḷem.

Pawos 53

Tata cara palas marabian sakadi ring sor:

- ha. Nawur prabea pasakṣi sinalih tunggil sami satenga.
- na. Paguṇakaya polih pah-pahan padha.

- ca. Pabekel, tatadan soang-soang kakuasa niri-niri miwah waris kuasa antuk puruṣa.
- ra. Ngwehin miwah ngupajiwa pratisentana mānūt swadharmaning guru rupaka.
- ka. Nawur pamidhaṇḍha pasuaran kulkul mānūt paraṇem.

Pawos 54

Prade riwekas sang palas kacihna adung malih, patūt:

- ha. Nglakṣaṇayang pawiwahan malih.
- na. Kadhaṇḍha nikel saking palas, yadiastu wit palase pecak sangkaning padha lila (kadhaṇḍha mānūt paraṇem).

Pawos 55

(1) Sang balu kaepah dados kalih:

- ha. Balu luh wit sentana rajeg miwah balu luh boya sentana.
- na. Balu muani kapuruṣa (wit sentana) miwah balu muani nyeburin (boya sentana).

(2) Swadharmaning balu inucap patūt:

- ha. Ngamanggehang patibrata tan kengin ngamargiang paradara/drati krama.
- na. Nguasayang waris paguṇakayan, tan dados ngadol, ngadeang, makidihang lan siosan punika, sajawaning kawehin antuk pianak uthāwi kulawarga pinih tampek sakeng kuṇenannya prade pianakne kantong alit-alit.
- ca. Kengin ngidih sentana prade wenten pidabdab sadurung sinalih tunggil padhem, saha polih paiguman olih kulawarga sane kapuruṣa.
- ra. Kengin mawiwaha malih, prade wenten uwak-uwakan anūt angka aksāra ring ajeng.

Pawos 56

Balu luh kaucap tan pageh sakadi ring sor:

- ha. Drati krama uthāwi paradara.
- na. Matilar saking pakubon tan pasadok jantos 6 (enem) śaśih.
- ca. Lempas ring swadharma aksāra 2 pawos 55, tan prasiddha ngehehin solah maprawerti aṇep ring pitudhuh kulawarga puruṣa.

Palet 3

Inḍhik Sentana

Pawos 57

- (1) Sentana wenten kalih pawos, sane kaucap pratisentana miwah sentana paperasan.
- (2) Pratisentana inggih punika sentana sane metu saking pawiwahan kapatūt.
- (3) Prade pawiwahane tan kapatūt ngwetuang sentana, mangda tan kantun kawāṣṭanin babiñjat uthāwi astra yogya kamanggala antuk panyangaskara.
- (4) Prade pawiwahan tan ngametuang sentana kengin ngidih sentana antuk upasakṣi sekala niskala sane kawāṣṭanin sentana paperasan.
- (5) Sentana rajeg inggih punika, pratisentana wadon (predana) sane kamanggehang lanang (puruṣa) tur risāmpun nglakṣaṇayang pawiwaha nyeburin.
- (6) Sang sane dados kaarsayang sentana rajeg inucap wiwit (4) inggih punika:
 - ha. Pratisentana wadon.
 - na. Sāmpun kamanggehang dados pratisentana lanang (puruṣa).
 - ca. Kapawiwahan kaceburin, kaultamayang jadma sane maagāma Hindu uthāwi jadma sane maagāma tiosan sane sāmpun nglakṣaṇayang pamarisuda raga uthāwi sudiwadani.
 - ra. Sane ngamanggehang sentana rajeg patūt masadok ring Prajuru Deśa tur I prajuru patūt nyiarang ring bañjar saha ngaturang ring Prajuru Deśa.

Pawos 58

- (1) Ngangkat sentana mānūt dudonan patūt makacihna artha braṇa paperasan sane kasakṣiang sekala niskala.
- (2) Sapa sira ugi krama pacang ngidih sentana patūt masadok ring Bendeśa saniṣṭane tigang śaśih sadurung pamerasan.
- (3) Bendeśa kawakilin antuk Klihan Bañjar nyiarang ring sawidangan deśa, sang sapa sira ugi rumasa tan lila mangda masengker kalih wuku sabanen pamerasan ring Bendeśa Adat.
- (4) Prajuru Deśa digelis mawosin saha napak ring catur dṛeṣṭa miwah paraṅem.

- (5) Prade sulur paperasan tan m^ānūt ring kecaping ajeng, Bendeśa Adat wenang ngandeg sang pacang makarya, saha nuntun, mangda kapuputang riyin bebawose uthāwi wicara.

Pawos 59

- (1) Paperasan sane kapatūt ring deśa risāmpun makacihna:
- ha. Widhi widhaṇa pamerasan.
 - na. Kasakṣinin antuk Prajuru Deśa sane makelingan uthāwi ngilikitayang.
 - ca. Kasiarang ring wewidangan deśane.
- (2) Sane patūt peras anggen sentana kadi ring sor:
- ha. Jadma maagāma Hindu.
 - na. Kulawarga saking puruṣa, saking wadon miwah sakama-kama.
 - ca. Sinalih tunggil mawiwit saking kulawarga tunggal sanggah uthāwi mrajan, paibon lan dadia utāwi ngambil anak tios sakewanten mangda ngānūtin maagāma Hindu.
- (3) Kengin ngangkat sentana langkung ring adiri, lanang wiadin wadon.

Palet 4

Iṇdhik Warisan

Pawos 60

- (1) Warisan inggih punika artha braṇa saha ayah-ayahan ngupadi sukertha sekala niskala saking kaluhurannya.
- (2) Sane kasinanggeh warisan luire:
- ha. Druwe tengah makadi tegal, carik, karang ayahan deśa, kahyangan, pusaka siwa kraṇa.
 - na. Pamrajan kemulan.
 - ca. Paguṇakayan, tatadan/jiwa dāna, hutang-piutang.
- (3) Wawu kengin kabawos warisan prade wenten:
- ha. Sang mapiturun (pawaris).
 - na. Katurunan (ahli waris).

ca. Artha braṇa miwah tetegenan (ayah-ayah) makacihna warisan.

Pawos 61

(1) Ahli waris, luire:

ha. Pratisentana puruṣa.

na. Pratisentana pradana (sentana rajeg).

ca. Sentana paperasan lanang/wadon.

(2) Prade tan wenten kadi kecaping ajeng, sang sinanggeh ahli waris:

ha. Turunan puruṣa pernah ngunggahang rarama lanang, pekak salantur ipun rarama misan mindon.

na. Turunan puruṣa pernah ka samping makadi kaponakan miwah mindon.

Pawos 62

Swadharmaning ahli waris patūt:

ha. Nerima saha ngutsayang tetamian pah-pahan kaluhurannya, makadi ngrempon sanggah, pura saha pangupakārannya, makadi ngrempon ayah-ayahan pawaris / nyeledihinin.

na. Naurin utang pawaris sane mānūt panglokika.

Pawos 63

Pangepahan waris ngānūt makadi ring sor:

ha. Risāmpun kalakṣaṇayang Pitra Yajña lan utang pawaris katawur.

na. Para ahli waris polih pahan padha.

ca. Sinalih tunggil ahli waris kengin tan polih pahan prade:

1. Nilar kawitan lan śāsananing agāma.

2. Sentana rajeg keṣah mawiwaha uthāwi prati sentana nyeburin, soang-soang kabawos ninggal kedaton.

ra. Boya ahli waris kengin muponin pikolih mānūt dudonan inggih punika: sentana wadon salami durung mawiwaha.

ka. Pawaris kengin maweweh rikala maurip pinaka jiwa dhana tatadan. bekel maka cihna paweweh

Pawos 64

- (1) Prade ring pakulawargan wenten ahli waris langkungan ring adiri patūt:
 - ha. Kawentenang paiguman iṅdhik pedhum waris inucap.
 - na. Yen tan prasiddha katunasang tetimbang Prajuru Deśa (Kertha Deśa).
 - ca. Prade taḷer tan wenten cumpu ring panepas Kertha Deśa, kengin katunasang ring sang rumawos.
- (2) Prade karang kaputungan, patūt Prajuru Deśa nibakang ring:
 - ha. Sang sinanggeh ahli waris mānūt pawos 62.
 - na. Sang kengin anggen sentana mānūt pawos 59 (2) miwah (3), kengin katunasang ring sang rumawos.
 - ca. Prade taḷer tan wenten cumpu ring panepas kertha Deśa, kengin katunasang ring sang rumawos.
- (3) Prade jantos karang deśa kaepah uthāwi kasepih, patūt soang-soang nedunin makrama deśa ngarep.

SARGA VI

WICARA LAN PAMIDHAṆDHA

Palet 1

Iṅdhik Wicara

Pawos 65

- (1) Sane wenang mawosin makadi mutusang wicara ring Deśa Adat inggih punika Prajuru Deśa sinanggeh Kertha Deśa.
- (2) Prade sang mawicara tan wenten cumpu ring pamutus Kertha Deśa, kengin nunas wicara inucap ring sang rumawos.

Pawos 66

- (1) Sahanan wicara mawiwit kacorahan sakaluire sinananggeh nungkasin daging awig-awig pasuaran miwah paraḡem deśa/bañjar, prajuru patūt digelis mawosin tan nyantos pasadok.
- (2) Sajaba wicara kadi ring ajeng patūt nyantosin pasadok sang nunas bawos.

- (3) Panepase patūt paṣṭika nyantenang iwang patūt malarapan Tri Pramana (sakṣi, ilikita lan bhukti} miwah tan maren nepek ring catur dṛeṣṭa.

Palet 2

Iṇdhik Pamidhaṇḍha

Pawos 67

- (1) Deśa/baṅjar wenang niwakang pamidhaṇḍha ring warga deśa sane sisip.
- (2) Patiwak inucap kalakṣaṇayang olih Bendeśa /Klian Baṅjar.
- (3) Bacakan pamidhaṇḍha luire:
 - ha. Ayahan panuku kasisipan.
 - na. Dhaṇḍha artha (dadosan saha panikelannya uthāwi panikel paturunan).
 - ca. Pangupakāra.
 - ra. Rerampagan.
 - ka. Kadaut karang ayahannya.
 - da. Pamidhaṇḍha padewa sakṣi.
 - ta. Kasepekan.
- (4) Ageng alit pamidhaṇḍha sane katiwakang masor singgih manūt kaiwangan uthāwi sisipnya mānūt paraṇem.
- (5) Sahanan jinah uthāwi raja braṇa pamidhaṇḍha ngraṅjing dados druwen deśa uthāwi baṅjar.

Pawos 68

- (1) Krama sane nenten naur urunan mānūt panemaya uthāwi tan naur cicilan utang ring LPD Jumpai mānūt panemaya patūt keni panikel.
- (2) Yening langkungan ring tigang śaśih (sangkepan) tan naur panikelnya patūt karampag.
- (3) Tata cara nglakṣaṇayang rarampagan mānūt kadi ring sor:
 - ha. Kalakṣaṇayang antuk prajuru kasarengin antuk krama baṅjar kirang langkung tigang diri maka sakṣi.
 - na. Sang ngrampag sangkaning darṣaṇa ngambil artha braṇa uthāwi nyawenin tanem tuwuh, mabobot

PAMUPUT

Pawos 72

- (1) Awig-awig puniki kararemin duk rahiņa: Anggara Kliwon Dukat, śasih Kalima, Isaka 1918, tanggak Masehi 26 Nopember 1996, ring Bale Deśa Adat Jumpai.
- (2) Awig-awig puniki kalinggatanganin antuk Bendeśa kasarengin klian-klian baņjar/tempek saha kasakřiang antuk klian-klian baņjar dinas miwah kepala deśa sawidangan deśa.
- (3) Luir sang nglingga tanganin:

I. Kapertama Prajuru/Dulun Deśa:

1. Bendeśa Adat Jumpai



(I Made Soma, A.Ma.Pd.)

2. Klian Baņjar Kangin



(I Wayan Punia)

3. Klian Baņjar Kawan



(I Nengah Ringkeg)

4. Klian Dinas Baņjar Kangin



(I Nengah Sudana)

5. Klian Dinas Baņjar Kawan



(I Ketut Kipug)

6. Kepala Desa Jumpai



(I Made Kajeng)

Mengetahui dan telah dicatatkan:

Tanggal : ..26.. ~~November~~ ..1996.....

Reg. Nomor : ..189 / 03 / Hk / 97.....

Bupati Kepala Daerah Tingkat II Klungkung



(DRS. IDA BAGUS OKA)

